



Komunikadu Imprensa
12 Maiu 2020

JSMP husu ba parte sira atu respeita desizaun Tribunál Rekursu relasiona ho desizaun ba petisaun Partidu CNRT

Iha 05 Maiu 2020, deputadu bankada CNRT (*Congresso Nacional de Reconstrução de Timor*), na'in 18 ofisialmente liuhosi sira-nia advogadu entrega ona petisaun ba iha Tribunál Rekursu ne'ebé hala'o mós papél nu'udar Tribunál Supremu Justisa. Intensaun husi prosesu ne'e mak atu husu fiskalizaun ba aktu Prezidente Repúblika nian ne'ebé konsidera viola nia obrigasaun konstitusionál sira relasiona ho asuntu demisaun Primeiru-Ministru, nomeasaun membru Governu sira no sumba Orsamentu Jerál Estadu iha Parlamentu Nasionál ne'ebé liu ona loron 60 ne'ebé Prezidente Repúblika la dizolve Parlamentu Nasionál. Kestaun sira ne'e nu'udar baze ba Partidu CNRT nia petisaun.

"JSMP apresia aas ho aktu deputadu sira CNRT nian hodi uza kanál tribunál nu'udar meu ne'ebé apropriadu tuir lei hodi solusiona impase política. Mezmu nune'e, JSMP husu ba parte sira atu kumpri desizaun Tribunál Rekursu hodi halo tuir mekanizmu própriu ne'ebé prevee iha Artigu 79 pontu 2) & 3) K-RDTL,"dehan Sra. Ana Paula Marçal, Diretora Ezekutiva JSMP.

"sei hahú prosesu ne'e iha Parlamentu Nasionál tuir proposta husi baluk-lima ida (1/5) ho deliberaun aprovadu tuir maioria baluk-tolu rua (2/3) husi Deputadu hotu-hotu (Artigu 79 pontu 3)) bainhira Prezidente Repúblika klara iha violasaun momoos no boot kona-ba nia obrigasaun Konstitusionál hanesan prevee iha Artigu 79 pontu 2)".

JSMP kontinua enkoraja tribunál atu kontinua hala'o nia kna'ar konstitusionál ho imparsiál no akuntabilidade hodi garante kredibilidade instituisaun ne'e no gaña konfiansa públiku nian nu'udar órgaun soberanu ne'ebé iha kompeténsia atu administra justisa hodi povu nia naran no ema hotu tenke kumpri tribunál nia desizaun sira.

Aktu ida ne'ebé bankada CNRT halo ne'e nu'udar referénsia ne'ebé partidu sira seluk bele halo tuir iha futuru bainhira mosu problema sira ne'ebé hanesan, importante mak tenke uza mekanizmu ne'ebé própriu no loos. Aleinde, prosesu sira relasiona ho kompeténsia órgaun soberanu sira-nian ba petisaun, JSMP mós enkoraja ba públiku sira atu uza mós mekanizmu

petisaun ne'ebé konsagra iha Artigu 48 K-RDTL kona-ba petisaun bainhira iha problema ruma relaciona ho violasaun ba direitu, Konstituisaun, lei ka interese ema hotu nian hasoru órgaun soberanu sira ka kualkér autoridade sira.

Atu hetan informasaun liutan favór kontaktu direktamente:

Ana Paula Marçal

Diretóra Ezekutiva JSMP

Email: ana@jsmp.tl

Telefone: 77040735 | 3323883

Website: <http://jsmp.tl/>

